

## Iwwer die Kerb

Vor e paar Daach hawwe de Schorsch unn isch iwwer die Kerb gebabbeld, weil mir warn Kerweborsch 1954 unn dess iss dissjohr schunn 65 Johr her. Unn was warn merr fern starke Johrgong 1935! Unn weil allminonner mettgemachd hawwe simmer sechsisch Kerweborsch gewese.

Dess iss heit gons onnersders, hott de Schorsch gemoond, weil zu der Zeit, als mir neunzeh Johr alt warn, hadde die meisde vunn unns schunn ausgelernt.

Ja, saach isch, mir sinn joo aach schunn mett verrzeh odder fuffzeh direkt nooch de Volksschul in die Lehr gonge unn nor e paar vunn uns warn uff de Heher Schul, wie merr gesaad hott, also uffem Gymnasium.

De Schorsch druff: Du warst doch aach uff de Heher Schul, in Risselsem, odder?

Isch habb gegrinst. Awwer nitt long, isch wollt halt koo Latein lerne unn wer sellemols nitt Latein lerne wollt, der hott des Gymnasium velosse misse. No ja, donn habb isch halt mett fuffzeh e Lehr oogefonge. Awwer isch glaab, dass kooner vunn unserm Johrgong, der uff die Heher Schul gonge iss, bei de Kerweborsch mettgemachd hott.

Doo seet de Schorsch: Dess waaß isch nimmi. De Philipp unn de Erich hädde dess noch gewissd, awwer die sinn joo nimmi doo. Unn dess isses: Weil heit die meisde vunn de junge Kerl entweder noch in de verschiedene Schule gieh odder noch in de Ausbildung sinn, mache die bei de Kerb nitt mett.

Isch habb schunn widder gegrinst: Aach wars joo su, dass mir saache merr mol als Vize unn mett Achtzeh erst oogefonge hawwe, nooch de Mädcher ze gugge. Heit fonge die joo mett Fuffzeh, heechstens Sechzeh doodemett oo unn statt bei de Kerweborsch mettzemache hawwe die schunn enn onnern Zeitvertreib.

Ach Honnes, hott de Schorsch gesaad, dess mett de Kerweborsch werdd nix mieh. Unn doo finn isch dess gut, dass enn Kerweverein gegründ werrn soll, mett junge Leit unn mett e bissi äldere Männer unn Fraue, die sischs ze Uffgab mache, die Kerb unn die Traditione mett Kerweboom, Umzuuch unn Bobbverbrenne uffrechd ze halle. Unn wer nitt mett mettmähd kann dem Kerweverein jed Johr e Spende mache, weil su odder su die Kerb immer mieh Geld kossde dut.

Ja, saach isch, doo hosde recht. Su enn Kerweverein kann die Kerb dorschfiehrn, weil sunnst iss die Kerb bald nor noch e Kirchweih mett Rummelplatz, mett Reitschul und Schießbud unn was sunnst noch debeigeheern dut.

Awwer Honnes, moont doo de Schorsch, ess iss joo heit noch su in unserm Johrgong, dass die ehemalige Kerweborsch mett ihrne Fraue noch immer bei de Kameradschaft 1935 debei sinn unn bei unsern Treffe unn Feiern mettmache. Was doomols als Kameradschaft oogefonge hott, mett Bihnebau als Vize unn als Kerweborsch im große Saal vumm Herrsch, beim Roseknibbele ferr Bihn unn Umzuuchswaache beim Friseur Schleidt mett de Kätta Spillmonn, de Frau Helmecke, de Lalas Lene unn de Schitzentille hält uns bis heit sesomme. Su ebbes werdd in su emm Kerweverein sicher aach emol kumme, enn Zesommehalt iwwer gude unn schleschde Johnn.

Wennse koon Krach kriehn iwwers Geld, hott de Schorsch noch gesaad. Mir hawwe nie Krach griecht weeschem Geld, dess war emm Erich soi Sach unn der hott de Gori zesommegehalle, aach wenn de Vorstond emol ze vill ausgewwe wollt. Unn in dere Tradition dut die Kameradschaft 1935 heit noch immer lewe.

Eiern Honnes